

四庫全書

史部

欽定四庫全書

元史卷三十五

明翰林學士亞中大夫知制誥兼修國史宋濂等修

本紀第三十五

文宗四

二年春正月己卯御製奎章閣記行樞密臣言去歲十一月仁德府權達嚕噶齊庫楚糾集兵衆討雲南首敗布呼賊兵于馬龍州是月十一日殺布呼弟巴延獻馘

於豫王十三日戰于馬金山獲布呼及其弟巴延徹爾其黨拜布哈布延特穆爾等十餘人誅之餘兵皆潰獨祿余猶據金沙江有旨趣進兵討之庚辰住持大承天護聖寺僧寶峯加司徒辛巳大名魏縣民曹革輸粟賑陝西饑旌其門癸未立侍正府以總近侍秩從二品乙酉時享太廟丙戌巴延伊嚕特穆爾伊嚕布哈鄂博哈雅等十四人並以本官兼侍正旌大都大興縣郭仲安妻李氏貞節丁亥以壽安山英宗所建寺未成詔中書

省給鈔十萬錠供其費仍命雅克特穆爾薩題等總督
工役命後衛指揮使史損往四川行省調軍官選戍子
命努圖克齊阿里和卓按行北邊牧地以晉邸部民劉
元良等二萬四千餘戶隸壽安山大昭孝寺為永業戶
中書省臣言達春圖卜特穆爾等討雲南以去歲十一
月九日領兵至烏撒周泥驛明日祿余阿奴阿荅等賊
兵萬餘自山後間道潛出達春圖卜特穆爾等進擊屢
敗之十五日戰七星關六日凡十七戰賊大敗潰去詔

遣使以銀幣賞達春圖卜特穆爾等造歲額鈔本至元鈔八十九萬五千錠中統鈔五千錠給鈔五千錠賑寧海州饑民罷益都等處廣農提舉司改立田賦總管府秩從三品仍隸隆祥總管府命興和路建雅克特穆爾鷹棚樞密院臣言四川行省地鄰烏撒而雲南未平今戍卒單少宜增兵防遏請調夔路齊哩克昆戶丁七百重慶河東五路兩營兵三百同往戍之俟征進軍還日悉罷遣從之庚寅改東路蒙古軍萬戶府為東路蒙古

侍衛親軍指揮使司諸王哈爾滿遣使來貢葡萄酒國
制累朝行帳設衛士給事如在位時近嘗汰其冗濫武
宗仁宗兩朝各定為八百人英宗朝七百人中書省臣
言舊給事人有失職者詔復其百人辛卯皇太子喇特
納達喇薨壬辰命宮相法里及給事者五十八人護靈
輦北柩葬于山陵仍令法里等守之御史臺臣劾奏福
建宣慰副使哈濟前為廣東廉訪副使貪污狼籍宜罷
黜從之己亥遣吏部尚書薩爾幹佩虎符禮部郎中趙

期願佩金符賫即位詔告安南國且賜以授時厯賜武
寧王齊齊克圖金百兩銀五百兩以淮安路之海寧州
為食邑癸卯以皇子古嚕達喇疹疾愈賜雅克特穆爾
及公主察球爾各金百兩銀五百兩鈔二千錠薩都等
金銀鈔各有差賜醫巫乳媪宦官衛士六百人金三百
五十兩銀三千四百兩鈔五千三百四十錠甲辰敕每
歲四祭五福太乙星建孔子廟于後衛至元末討諸王
納延之叛獲其部蒙古軍分置河南江浙湖廣江西諸

省命樞密院遣使括其數得二千六百人乙巳封蒙古
巫者所奉神為靈感昭應護國忠順王號其廟曰靈祐
給衛士萬人歲例鈔人八十錠內以他物及粟折五之
一鎮西武靖王吹巴勒豫王喇特納實哩及行省行院
官同討雲南兵十餘萬以去年十一月十一日吹巴勒
師次羅羅斯期伊爾特穆爾俱至三泊郎仍趣蘇爾約
蘇會于曲靖馬龍等州同進兵伊爾特穆爾倍道兼進
奪金沙江十二月十七日大兵與阿哈蒙古軍相值戰

敗之阿哈偽降明日率其兵三千為三隊來襲我營吹
巴勒伊爾特穆爾等分十三隊又擊敗之阿哈竄走大
兵直趣中慶二十六日遇賊黨蒙古軍于安寧州與再
戰又大敗之二十八日阿哈來逆戰遂就禽斬于軍前
三十日將抵中慶賊兵七千猶拒戰于伽橋古壁口兵
交伊爾特穆爾左頰中流矢洞耳後拔矢復與戰大捷
遂復行省治諸軍皆會駐于城中分兵追捕殘賊于嵩
明州樞密院臣以捷聞詔總兵官量度緩急從宜區處

新添安撫司覓河寨主訴他部徭獠蹂其禾民饑命湖
廣行省發鈔二千錠市米賑之二月丙午以上都留守
奈瑪台行嶺北行樞密院事太禧宗裡使錦濟勒達朗
達爾瑪聶呼四人並知院事遙授平章政事戊申立廣
教總管府以掌僧尼之政凡十六所曰京畿山後道曰
河東山右道曰遼東山北道曰河南荆北道曰兩淮江
北道曰湖北湖南道曰浙西江東道曰浙東福建道曰
江西廣東道曰廣西兩海道曰燕南諸路曰山東諸路

曰陝西諸路曰甘肅諸路曰四川諸路曰雲南諸路秩正三品府設達爾噶齊總管同知府事判官各一員宣政院選流內官擬注以聞總管則僧為之四川行省招諭懷德府驢谷什用等四洞及生蠻十二洞皆內附詔陞懷德府為宣撫司以鎮之諸洞各設長官司及巡檢司且命各還所掠生口湖廣叅政徹爾特穆爾與蘇蘇巴勒丹怨望鞠問得實刑部議當徹爾特穆爾巴勒丹杖一百七蘇蘇處死會赦徹爾特穆爾流廣東巴勒丹

廣西蘇蘇徙海南皆置荒僻州郡有旨此輩怨望于朕
向非敕原俱當寘之極刑可俱籍其家蘇蘇禁錮終身
已酉白虹貫日旌鞏昌金州民杜祖隆妻張氏志節樞
密院臣言徹爾特穆爾博囉以正月戊寅敗烏撒蠻兵
射中祿余降其民烏蒙東川易良州蠻兵夷獠等俱已
款附鎮西武靖王吹巴勒等駐中慶復行省事豫王喇
特納實哩等至當當驛安輯其人民又言激江路蠻官
郡容報賊呼喇呼及圖沁之弟巴爾圖默色等偽降于

豫王而反圖之至易龍驛呼喇呼等兵掩襲官軍四川
行省平章達春頓兵不進平章竒珠妻子孳畜為賊所
掠謀知圖沁方修城堡布兵拒守無出降意詔速進兵
討之刺特默齊軍士歲以五月十日遷處山後諸州辛
亥建雅克特穆爾居第于興聖宮之西南詔薩題及留
守司董其役壬子太白晝見中書平章政事伊拉齊兼
瀋陽等路安撫司燕王宮相巴咱爾為中書平章政事
陝西行臺中丞多爾濟巴勒為中書叅知政事戶部尚

書高履亨兩淮都轉運鹽使許有壬並叅議中書省事
甲寅雅克特穆爾言賽音克呼木台英宗時獻寶貨于
昭獻元聖太后議給鈔十二萬錠故相拜珠奏酌七萬
錠未給泰定間以鹽引萬六百六十道折鈔給之今有
司以詔書奪之還官臣等議以為寶貨太后既已用之
宜以鹽引還之從之雅克特穆爾又言安慶萬戶索珠
坐令家人殺人繫獄久未款伏宜若無罪乞釋之制曰
可己卯太白犯昴祀太祖太宗睿宗御容雲南統兵官

來報捷諸蠻悉降唯祿余追捕未獲命番休各衛漢軍
十之二以三月一日放遣丁巳駙馬布延特穆爾自北
邊從武寧王齊齊克圖來朝己未命西僧為皇子古魯
達喇作佛事一周歲壬戌徙武寧王齊齊克圖為郅王
賜金印甲子中書省臣言國家錢穀歲入有額而所費
浩繁是以不足天歷二年嘗以鹽賦十分之一折銀納
之凡得銀二千餘錠今請以銀易官帑鈔本給宿衛士
卒又言陛下不用經費不勞人民創建大承天護聖寺

臣等願上嚮所易鈔本十萬錠銀六百錠助建寺之需
從之丙寅以太祖四大行帳世留朔方不遷者其馬馳
孳畜多死損發鈔萬錠命內史府市以給之行樞密院
都事阿里和卓來報雲南之捷庚午給宿衛士歲例鈔
詔毋出定額萬人之外占城國遣其臣高暗都刺來朝
貢建五福太一宮于京城乾隅修上都洪禧崇壽等殿
諸王齊齊克圖沙格妄言不道詔安置齊齊克圖廣州
沙格雷州壬申命遼陽行省發粟賑國王多爾濟及納

古爾岱爾等六部軍民萬五千戶旌大都民劉德仁妻
王氏貞節甲戌給宣讓王王傳印荊王伊蘇額布根貢
犛牛命田賦總管府稅鑛銀輸大承天護聖寺命興和
路為伊魯布哈作鷹棚雲南景東甸蠻官阿只弄遣子
罕旺來朝獻馱象乞陞甸為景東軍民府阿只弄知府
事罕旺為千戶常賦外歲增輸金五十兩銀七百兩許
之以山東鹽課鈔萬錠賑膠州饑命龍翊衛以屯田歲
入粟贍衛卒孤貧者是月深冀二州有蟲食桑為災三

月丙子朔熒惑犯鬼宿辛巳御史臺臣劾奏燕南廉訪使布扎爾前為閩海廉訪使受贓計鈔二萬二千餘錠金五百餘兩銀三千餘兩男女生口二十二人及它寶貨無算雖遇赦原宥追奪制命籍沒流竄詔如所言仍暴其罪示天下壬午賜南郊侍祠文武官金幣有差特令沙津阿古齊布勒圖鼎爾為三藏國師錫以玉印以陝西鹽課鈔萬錠賑察汗諾爾蒙古饑民癸未割外府幣帛各千匹輸之中宮以供需用甲申繪皇太子真容

奉安慶壽寺之東蓋頂殿祀之如累朝神御殿儀鞠宦者拜珠侍皇太子疹疾飲食不時進以酥拭其眼鼻又為禳祝杖一百七斤出京城冠州有蟲食桑四十餘萬株御史臺臣言奎章閣叅書雅勒呼阿媚奸臣所為不法宜罷職從之丙戌雨土霾巴咱爾辭所兼儲政使不允巴延娶諸王女賜金二百兩銀千兩賜上都死事者布延特穆爾等十一家鈔各百錠賜雅克特穆爾鷹坊百人中書省臣言宣課提舉司歲權商稅為鈔十萬餘

錠比歲數不登亡凡僧道為商者仍征其稅有旨誠為
僧者其仍免之司徒實沙言陶弘景胡笳曲有負展飛
天厯終是甲辰君之語今陛下生年紀號實與之合此
實受命之符亡錄付史館頒告中外詔令翰林集賢奎
章禮部雜議之翰林諸臣議以謂唐開元間太子賓客
薛讓進武后鼎銘云上玄降監方建隆基為玄宗受命
之符姚崇表賀請宣示史官頒告中外而宋儒司馬光
斥其采偶合之文以為符瑞乃小臣之諂而宰相實之

是侮其君也今弘景之曲雖于生年紀號若偶合者然
陛下應天順人紹隆正統于今四年薄海內外罔不歸
心固無待于旁引曲說以為符命從其所言恐啟纖緯
之端非所以定民志事遂寢趙王巴哩納食邑沙淨德
寧等處蒙古部民萬六千餘戶饑命河東宣慰發近倉
糧萬石賑之又發山東鹽課鈔朱王倉粟賑登萊饑民
興和倉粟賑保昌饑民戊子以西僧烏尼德巴迪爾班
第為三藏國師賜金印以龍慶州之流杯園池水磴土

田賜雅克特穆爾命諸王阿勒楚爾鎮陝西以籍入蘇
蘇巴勒丹徹爾特穆爾貲產賜大承天護聖寺為永業
浙西諸路比歲水旱饑民八十五萬餘戶中書省臣請令
官私儒學寺觀諸田佃民各從其主假貸自賑餘則勸
分富家及入粟補官仍益以本省鈔十萬錠并給僧道
度牒一萬道從之旌同知大都府事孟古圖嚕默色妻
呼穆蘇貞節己丑賑雲內州饑民及察呼涼樓戍兵共
七千戶庚寅命威順王庫春布哈還鎮湖廣癸巳詔累

朝神御殿之在諸寺者各製名冠之世祖曰元壽昭睿
宗聖皇后曰睿壽諾爾布皇后曰懿壽裕宗曰明壽成
宗曰廣壽順宗曰衍壽武宗曰仁壽文獻昭聖皇后曰
昭壽仁宗曰文壽英宗曰宣壽明宗曰景壽召亳州太
清宮道士馬道逸汴梁朝天宮道士李若訥河南嵩山
道士趙亦然各率其徒赴闕修普天大醮賑浙西鹽丁
五千餘戶命伊魯布哈作佛事于德興府監察御史劾
江浙行省平章通通荒泆宴安才非輔佐詔免其官豫

王喇特納實哩鎮西武靖王吹巴勒等禽雲南諸賊額
默根羅羅托克托穆爾博勒巴居澂江路總管羅羅布
哈布呼之叔沁達罕偽署萬戶哈喇岱爾及諸將校悉
斬之磔尸以徇賑遼陽境內蒙古饑民萬四千餘戶旌
山丹州郝榮妻李閏貞節陝州諸縣蝗八番軍從征雲
南者俱屯貴州樞密院臣請遣使發粟給之己亥御史
臺臣劾奏大都總管劉原仁稱疾久不視事及遷同知
儲政院事即就職僥倖巧宦避難就易有旨罷之庚子

以將幸上都命西僧作佛事于乘輿次舍之所壬寅以
欽察衛軍士增多折為左右二衛給雲南行省鈔十萬
錠以脩軍資民食癸卯御史臺臣劾奏工部尚書蘇炳
性行貪邪詔罷之大同路累歲水旱民大饑裁節衛士
馬芻粟自四月一日始壽王托里齊陽翟王特穆爾齊
西平王袞布巴勒昌王巴拉寶哩等七部之民居遼陽
境者萬四千五百餘戶饑命遼陽行省發近境倉糧賑
兩月命宣靖王邁努置王傳等官立宮相都總管府秩

正三品給銀印以儒學教授在選數多凡仕由內郡江淮者注江西江浙湖廣由陝西兩廣者注福建由甘肅四川雲南福建者注兩廣敕河南行省右丞諾海提督境內屯田中書省臣言嘉興平江松江江陰蘆場蕩山沙塗沙田等官地其嘗賜他人者今請改賜雅克特穆爾有旨雅克特穆爾非他臣比其令所在有司如數給付發通州官糧賑檀順昌平等處饑民九萬餘戶以山東鹽課鈔三千五百錠賑益都三萬餘戶是月陝西行

省遣官分給復業饑民七萬餘口行糧賑諸王巴延額布根部內蒙古饑民千餘口真定汴梁二路恩冠晉冀深蠡景獻等八州俱有蟲食桑為災旌故戶部主事趙野妻柳氏貞節夏四月丙午朔全寧民王托歡獻銀鑛詔設銀場提舉司隸中政院中書樞密臣言天歷兵興諸領軍與敵戰者宜定功賞臣等議諸王各金百兩銀五百兩金腰帶一織金等幣各十八匹諸臣四戰以上者同三戰及一戰者各有差有旨賞格具如所議雅克

特穆爾首倡大議躬擐甲冑已延在河南先誅携貳使
朕道路無虞兩人功無與比賞不可與衆同其賜雅克
特穆爾七寶腰帶一金四百兩銀九百兩巴延金腰帶
一金二百兩銀七百兩受賞者凡九十六人用金二千
四百兩銀萬五千六百兩金腰帶九十一副幣帛千三
百餘疋命西僧于五臺及霧靈山作佛事各一月為皇
太子古魯達喇祈福以糧五萬石賑糴京師貧民戊申
皇姑魯國大長公主薨以宮中高麗女子布延塔納賜

雅克特穆爾高麗國王請割國中田為資送遣使往受之發衛卒三千助建大承天護聖寺庚戌詔建雅克特穆爾生祠于紅橋南樹碑以紀其勲御史臺臣言平章政事曹立德任江浙今雖閑廢猶與富民交納宜遣還其本籍大同路又監察御史萬嘉律嘗薦中丞和尚托克托嘗舉廉訪使布拉爾今和尚布扎爾俱以贓罪除名萬嘉律托克托難任本職並從之真定武陟縣地震逾月不止壬子命雅克特穆爾總制宮相都總管府事

額布勒巴咱爾俱以本官兼宮相都總管府都達爾噶
齊諸王叶爾滿遣使來朝貢甲寅改宣忠扈衛親軍都
萬戶府為宣忠烏魯斯扈衛親軍都指揮使司賜銀印
中書省臣言越王圖沁在武宗時以紹興路為食邑歲
割賜本路租賦鈔四萬錠今其子喇特納實哩襲王號
宜歲給其半從之己卯時享太廟鎮西武靖王吹巴勒
等已平雲南各遣使來報捷諸王圖烈納鎮雲南品甸
自以貲力給軍協力討賊詔以襲衣賜之丙辰葺太祖

所御大行帳戊午以集慶路玄妙觀為大元興崇壽宮
命興和建屋居海青上都建屋居鷹鶚庚申特命河南
儒士吳炳為藝文監典簿仍予對品階寧國路涇縣民
張道殺人為盜道弟吉從而不加功居囚七年不決吉
母老無他子孫中書省臣以聞敕免死杖而出之俾養
其母辛酉以山東鹽課鈔五千錠賑博興州饑民九千
戶一千錠賑信陽等場鹽丁御史臺臣言儲政使哈扎
爾布哈侍陛下潛邸時受馬七十九疋又盜用官庫物

天厯初領兵蘆溝橋迎敵即逃擅閉城門驚惑民庶度支卿納克楚嘗匿官馬又矯增制命又受諸王沃濟七寶帶一鈔百六十錠臣等議其罪宜杖一百七除名斤還鄉里從之壬戌樞密院臣言雲南事已平鎮西武靖王吹巴勒言蒙古軍及哈刺章羅羅斯諸種人叛者或誅或降雖已畧定其餘黨逃竄山谷不能必其不反側今請留荆王伊蘇額布根及諸王索諾木等各領所部屯駐一二歲以示威重從之仍命豫王喇特納實哩分

兵給特默齊三百奇徹伯三百共守一歲以鎮輯之餘
軍皆遣還所部統兵官召赴闕時已命特默齊為雲南
行省平章政事遂命總制境內軍士潞州潞城縣大水
癸亥諸王鄂勒哲額布根所部蒙古民二百八十餘戶
饑命河東宣慰司發官粟賑之甲子陝西行省言終南
屯田去年大水損禾稼四十餘頃詔蠲其租鎮寧王諾
海部曲二百以風雪損孳畜命嶺北行省賑糧兩月奇
徹台以名園為獻命御史臺給贓罰鈔千錠酌其直諸

王策巴言臣每歲扈從時巡為費甚廣臣兄豫王喇特
納實哩弟伊實巴勒歲給鈔五百錠幣帛各五千匹敢
援例以請制可詔故尚書省丞相托克托可視三寶努
例以所籍家貲還其家御史臺臣言同僉中政院事殷
仲容奸貪邪佞冒哀居官詔黜之揚州泰興縣饑民萬
三千餘戶河南行省先賑以糧一月後以聞許之命遼
陽行省發粟賑博囉部內蒙古饑民戊辰奎章閣以纂
修經世大典請從翰林國史院取托卜齊延一書以紀

太祖以來事蹟詔以命翰林學士承旨雅克布哈塔斯哈雅雅克布哈言托卜齊延事關秘禁非可令外人傳寫臣等不敢奉詔從之增置拱衛司儀仗命武備寺諸匠官避元籍特召趙世延于集慶詔以泥金輝和爾字書無量壽佛經千部壬申散遣宣忠扈衛新籍軍士六百人還鄉里期以七月一日還營衡州路屬縣比歲旱蝗仍大水民食草木殆盡又疫癘死者十九湖南道宣慰司請賑糧米萬石從之河中府蝗晉寧冀寧大同河間諸

路屬縣以旱不能種告饑甘州阿爾斯蘭密珪妻呼圖克德濟以貞節旌其門五月丙子皇太子影殿造祭器如裕宗故事敕建宮相都總管府公廨丁丑熒惑犯軒轅左角賜宮相都總管府給驛璽書調衛兵浚金水河己卯安南世子陳日焯遣其臣段子貞來朝貢安慶之望江縣淮安之山陽縣去歲皆水災免其田租丙戌太禧宗祗院臣言累朝所建大萬安等十二寺舊額僧三千一百五十人歲例給糧今其徒猥多請汰去九百四

十三人制可常德府桃源州去歲水災免其租丁亥復立齊哩克崑提舉司仍隸中政院命樞密院調卒修京城已酉置雲南等處宣慰司都元帥府以土官昭練為宣慰使都元帥又置臨江元江等處宣慰司兼管軍萬戶孟定路孟育路並為軍民總管府秩從三品者線蒙慶甸銀沙羅等甸並為軍民府秩從四品孟併孟廣者樣等甸並設軍民等官司秩從五品益都路宋德讓趙仁各輸米三百石賑膠州饑民九千戶中書省臣請依

輸粟補官例予官從之賑駐冬衛士二萬一千五百戶
糧四月庚寅立雲南省蘆傳路軍民總管府以土官為
之制授者各給金符癸巳雲南威楚路之蒲蠻猛吾來
朝貢願入銀為歲賦詔為置散府一及土官三十三所
皆賜金銀符甲午太白犯畢宿封宣政使托音為薊國
公以平江官田五百頃立稻田提舉司隸宮相都總管
府以未以陝西行臺御史大夫圖卜台知樞密院事御
史大夫伊嚕布哈累辭職江西行省平章多爾濟以疾

辭新任並許之托果斯娘去歲主明宗幄殿詔賜湘潭
州民戶四萬為湯沐奎章閣學士院纂修皇朝經世大
典成詔以泥金書佛經一藏丙申大駕幸上都四川行
省平章汪壽昌辭職不允敕在京百司日集公署自晨
及暮毋廢事賑灤陽桓州李陵臺實保齊實呼圖五驛
鈔二百錠桓州民以所種麥獻詔賜幣帛二匹慰遣之
戊戌次紅橋驛祀雅克特穆爾生祠以太禧宗禋院所
隸昭孝營繕司隸崇禧總管府賑遼陽東路蒙古萬戶

府饑民三千五百戶糧兩月已亥額爾吉納知行樞密院事八番西蠻官阿馬路奉方物入貢高郵寶應等縣去歲水災免其租庚子太陰犯太白辛丑太白經天改阿蘇萬戶府為宣毅萬戶府賜銀印命已延領之旌濟南章邱縣馬萬妻晉氏志節癸卯加額爾吉納太尉賜銀印以河間鹽課鈔四千錠賑河間屬縣饑民四千一百戶甲辰詔通政院整治內外水陸驛傳宣政院臣言舊制列聖神御殿及諸寺所作佛書每歲計二百十六令

汰其十六為定式制可東昌保定二路濮唐三州有蟲
食桑寧夏紹慶保定德安河間諸路屬縣大水六月乙
巳朔徵儲政院鈔三萬錠給中宮道路之用敕河南行
省立鄂博哈雅政蹟碑監察御史韓元善言歷代國學
皆盛獨本朝國學生僅四百員又復分辨蒙古色目漢
人之額請凡蒙古色目漢人不限員額皆得入學又監
察御史陳守中言請凡仕者親老別無侍丁奉養不限
地方名次宜從優附近遷調庶廣忠孝之道皆不報發

米五千石賑興和屬縣饑民丁未太白晝見乙卯監察御史陳良劾浙東廉訪使托克托濟延阿附權姦都爾蘇其生母何氏本父之妾而兄妻之欺誑朝廷封溫國夫人請黜罷憲職追還贈典御史臺臣以聞詔從之旌大都右警巡院胡德妻曹氏貞節壬戌以鈔萬五千錠賑國王多爾濟等九部蒙古饑民三萬三百六十二戶癸亥詔諸官吏在職役或守代未任為人行賕闕說即有所取者官如十二章論賊吏罷不叙終其身雖無所

取訟起減由已者罪加常人一等甲子太府監頒宮嬪
閹宦及宿衛士行帳資裝免控鶴衛士當驛戶丙寅雲
南出征軍悉還烏撒羅羅蠻復殺戍軍黃海潮等撒加
伯又殺掠良民為亂命雲南行省及行樞密院行境上
諸闕戍兵未可輕撤宜視緩急以制其變丁卯太陰犯
畢太白犯井庚午以揚州泰興江都二縣去歲雨害稼
免今年租樞密院臣言征西萬戶府軍七百人自泰定
以來累經優卹放還者四百五十人今邊防軍少例當

追使還營從之是月晉寧額齊訥二路旱濟寧路蟲食桑河南晉寧二路諸屬縣蝗大都保定真定河間東昌諸路屬州縣及諸屯水彰德路臨漳縣漳水決秋七月甲戌朔賜野馬川等處駐冬衛士衣藝文少監歐陽玄言先聖五十四代孫襲封衍聖公爵最五等秩登三品而用四品銅印于爵秩不稱詔鑄從三品印給之德安府去年水免今年田租旌德安應山縣高可燾孝行已郊以雲南既平惟祿余等懼罪竄伏降詔曲赦之辛巳

珠爾噶岱爾坐罪當流遠以騰吉斯舅氏故釋之壬午
祀太祖太宗睿宗御容于翰林國史院監察御史張益
等言竒珠台在英宗朝陰與中政使耀珠造謀誣告托
歡徹爾將搆異圖辭連潛邸致出居海南及天厯初都
爾蘇據上都遣竒徹台以兵拒命都爾蘇疑其有異志
復禽以歸即追言昔日耀珠之謀以自解皇上即位不
念舊惡擢居中書而又自貽厥咎以致奪官籍產旋復
釋宥以為四川平章今雲南未平與蜀接境其人反覆

不可信任宜削官遠竄仍沒入其家產臺臣以聞詔奪其制命金符同妻孥禁錮于廣東母籍其家仍詔諭御史凡儉人如竒徹台者其極言之毋隱特穆爾布哈辭御史大夫職不允乙酉遣使代祀護國庇民廣濟福惠明著天妃命西僧于大都萬歲山憫忠閣作佛事起八月八日至車駕還大都日止丁亥海南黎賊作亂詔江西湖廣兩省合兵捕之諸王楚斯節伊特甘布喀爾滿駙馬鄂勒哲特穆爾遣使獻葡萄酒壬辰以知樞密院

事圖卜台為御史大夫癸巳辰州興國二路蟲傷稼免
今年租甲午歸德府雨傷稼免今年租給諸衛士及蒙
古戶糧四月己未立閔子書院于濟南杭州火賑被災
民百九十戶丁酉調甘州兵千人薩里輝和爾兵五百
守贊布凌以防土番戊戌封巴延為浚寧王賜金印仍
前太保知樞密院事高郵府去歲水旱免今年租湖州
安吉縣大水暴漲漂死百九十人人給鈔二百貫瘞之
存者賑糧兩月庚子廣西徭賊平召諸王溫都遜特穆

爾還辛丑懷德府洞蠻二十一洞田先什用等以方物
來貢還所虜生口八百餘人給其家癸卯知行樞密院
事徹爾特穆爾以兵討叛蠻鎖力哈迷失戮其黨七百
餘人是月河南奉元屬縣蝗大都河間漢陽屬縣水冀
寧屬縣雨雹傷稼廬州去年水寧夏霜為災並免今年
田租賑靈夏鳴沙蘭山二驛戶二百九十定州新軍戶
千二百應理州民戶千三百糧各一月又賑隆興路饑
民九百戶糧一月大寧和衆縣何千妻栢州賽兒夫亡

以身殉葬旌其門八月甲辰朔日有食之封托琳和塔
拉為靖恭王實喇卜多爾濟為懿德王並給塗金銀印
西域諸王保賽音遣使和爾多卜丹來朝灤陽驛戶增
置馬牛各一免其和市雜役立上都孔子廟碑御史臺
臣劾奏宣徽副使僧格奉旨給宿衛士錢糧稽緩九日
玩法欺公罪當黜罷從之己酉以銀符二十八賜拱衛
直百戶命雅克特穆爾以鈔萬錠賜蒙古孤寡者辛亥
大駕南還大都壬子西域諸王達爾瑪襲圖烈特穆爾

之位遣諸王保勒濟雅台等來朝貢甲寅甲布特之孫
伊嚕特穆爾瑪魯額森來獻錫喇諾特賜金百兩銀千
五百兩鈔五百錠金帶一命宣課提舉司母叔雅克特
穆爾即舍商貨稅鄂爾多斯之地屢災畜牧多死民戶
萬七千一百六十命內史府給鈔二萬錠賑之己卯太
白犯軒轅大星丙辰封內史齊哩克為豐國公以星變
令羣臣議赦丁巳命邵王巴延特穆爾獵于撫州己未
立鎮寧王總管府于撫州公主托克托呼來朝以汴梁

路尉氏縣賜巴延為食邑詔刑部鞫內侍實喇布哈巫
蠱事凡當死者杖一百七流廣東西中書省臣言明年
海運糧二百四十萬石已令江浙運二百二十萬河南
二十萬今請令江浙復增二十萬本省叅政杜貞督領
從之復令賑糶米五萬石濟京城貧民旌濟寧路魏鐸
孝行揚州路呂天麟妻韋氏貞節庚申太白犯軒轅左
角中書樞密臣言西域諸王保賽音其臣克哱木台矯
王命來朝保賽音遣使來言請執以歸臣等議宗藩之

國行人往來執以付之不可宜令乘驛歸國以自辨制
可壬申陞侍正府秩正二品是月江浙諸路水潦害稼
計田十八萬八千七百三十八頃景州自六月至是月
不雨澧州泗州等縣去年水免今年租沅州饑賑糶米
二千石金州西和州頻年旱災民饑賑以陝西鹽課鈔
五千錠九月癸酉朔市諤爾根薩里宅命雅克特穆爾
奉皇子古嚕達喇居之中書省臣言今歲當飼馬駝十
四萬八千四百匹京城飼六萬匹餘令外郡分飼每匹

給芻粟價鈔四錠從之。己亥命留守司發軍士築駐蹕臺于大承天護聖寺東御史臺臣劾奏四川行省叅政馬銘發糧六千石餉雲南軍中道輒還預借俸鈔十九錠以娶妾又詬罵平章汪壽昌罪雖蒙宥難任宰輔帝曰綱常之理尊卑之分懵無所知其何以居上而臨下亟罷之丙子太白犯鎮星樞密院臣言雲南東川路總管普折兄那具會祿余兵殺烏撒宣慰使伊嚕東川路府判嘉琿達二十餘人又會布吡姪額芬領蒙古兵

擊羅羅斯臣等與雅克特穆爾議遣西域指揮使索珠
等發陝西都萬戶府兵直抵羅羅斯發碣門安撫司兵
絕大渡河直抵邛部州巡守關隘詔宣政院亦遣使同
往督之海南賊王周糾率十九洞黎蠻二萬餘人作亂
命調廣東福建兵隸湖廣行省左丞伊喇薩納統領討
捕之阿蘇及烏魯斯新戍邊者命遼陽行省給其牛具
糧食已卯發粟五千石賑興和路鷹坊庚辰樞密院臣
言六月中行樞密院官以兵與烏撒賊兵五戰破之惟

祿余竄伏未獲命四川行省給其軍餉賑興和寶昌州
饑民米二千石御史臺臣言大聖壽萬安寺壇主司徒
嚴吉祥盜公物畜妻孥宜免其司徒壇主之職從之禁
諸驛毋畜竄行馬免控鶴戶雜役湖州安吉縣久雨太
湖溢漂民居二千八百九十戶溺死男女百五十七人
命江浙行省賑卹之丁亥御史臺臣言江西行省叅政
李允中乃故內侍李邦寧養子器質庸下誤叨重選宜
黜罷從之庚寅幸大承天護聖寺以鈔五萬錠及預貸

四川明年鹽課鈔五萬錠給行樞密院軍需祿余寇順
元路癸巳罷供需府覆實司置廣誼司秩正三品以右
丞薩題領其務御史臺臣言太禧宗裡使通通淫侈不
潔不可以奉明裡又奎章閣鑒書博士柯九思性非純
良行極矯譎挾其末技趨附權門請罷黜之己未以金
虎符賜中書平章政事伊拉齊思州鎮遠府饑賑米五
百石丁酉雲南行省遣都事諾海鎮撫樂智等奉詔往
諭祿余及授以叅政制命至撒家關祿余拒不受俄而

賊大至諾海因與力戰賊乃退及晚烏撒兵入順元境
左丞特穆爾布哈禦戰諾海復就陣宣詔招之遂遇害
特穆爾布哈等斂兵還壬寅改隆祥總管府為隆祥使
司秩從三品冬十月甲辰遣秘書太監王珪等代祀嶽
鎮海瀆后土乙巳召行樞密院徹爾特穆爾蘇爾約
蘇還朝以前東川路總管普折子安樂襲其父職己酉
時享于太廟為皇子古嚕達喇作佛事釋在京死罪囚
二人杖罪者四十七人辛亥召江南行臺御史大夫阿

爾斯蘭哈雅赴闕癸丑幸大承天護聖寺蒙古都元帥
齊喇引兵擊阿哈賊黨于靖江路海中山為雲梯登山
破其柵殺賊五百餘人圖沁之弟必里克圖庫圖齊舉
家赴海死獲圖沁第二人子三人誅之甲寅杭州火命
江浙行省賑其不能自存者丁巳中書省臣言江浙平
江湖州等路水傷稼明年海漕米二百六十萬石恐不
足若令運百九十萬而命河南發三十萬江西發十萬
為宜又遣官齎鈔十萬錠鹽引三萬五千道于通潯陵

滄四州優價和糴米三十萬石又以鈔二萬五千錠鹽引萬五千道于通遼二州和糴粟豆十五萬石以鈔三十萬錠往遼陽懿綿二州和糴粟豆十萬石並從之燒在京積年還倒昏鈔二百七十餘萬錠戊午詔還平江路大玉清昭應宮田百頃官勿徵其租己未給宿衛士有官者芻豆諸王保賽音使者還西域詔酌其所貢藥物價值辛酉命西僧作佛事于興聖宮十有五日乃罷吳江州大風雨太湖溢漂沒廬舍孳畜千九百七十家

命江浙行省給鈔千五百錠賑之。己丑立昭功萬戶都總使府。巴延特穆爾布哈並兼昭功萬戶都總使。丙寅命大都路定時估。每月朔望送廣誼司以酌物價。雅克特穆爾獻所取西域犛牛五千十一月壬申朔日有食之。雲南行省言亦乞不薛之地所牧國馬歲給鹽以每月上寅日啖之則馬健無病。比因布呼叛亂雲南鹽不可到。馬多病死。詔令四川行省以鹽給之。己亥李彥通蕭布呼齊等謀反伏誅。丙子封諸王沃濟為保寧王。賜

以印其先所受印賜諸王呼圖克特穆爾之子綱阿塔
詔給伊喇薩納分行省印丁丑興和路鷹坊及蒙古民
萬一千一百餘戶大雪畜牧凍死賑米五千石戊寅樞
密院臣言天厯兵興以揚州重鎮嘗假淮東宣慰司以
兵權今事已寧宜以所部兵復隸河南行省又征西元
帥府自泰定初調兵四千一百人戍隆拉額齊訥期以
五年為代今已十年逃亡者衆宜加優卹以來歲五月
代還並從之己卯封覺特班為幽國公庚辰左右欽察

衛軍士千四百九十戶饑命上都留守司賑之辛巳以
戶部尚書耿煥為中書叅知政事癸未詔養雅克特穆
爾之子塔喇海為子賜居第及所籍李彥通貲產荊王
伊蘇特布根獻犛牛四百詔每歲樞密院宗正府遣官
與遼陽行省官巡厯諸郡毋令諸王所部擾民隆祥司
使鴻和爾布哈言海南所建大興龍普明寺工費浩穰
黎人不勝其擾以故為亂詔湖廣行省臣伊魯布哈及
宣慰宣撫二司領其役命廉訪司涖之辛卯諸王色埒

默遣使者七十四人來賑左欽察衛薩都等伊勒都額爾古駐冬軍千五百八十戶諸鹽課鈔以十分之一折收銀銀每錠五十兩折鈔二十五錠已未敕宮相都總管府勿隸昭功都總使府丁酉以南陽府之嵩州更賜巴延為食邑十二月戊申陝西行臺御史訥古伯高坦等劾奏本臺監察御史陳良恃勢肆毒徇私破法請罷職籍贓遣歸田里有旨雖會赦其准風憲例追奪勅命餘如所奏以黃金符鑄文曰翊忠徇義迪義同勲賜西

域親軍副都指揮使奇徹以旌其天厯初紅橋戰功壬子復命諸王呼喇珠還鎮雲南癸丑薩都獻烏魯斯十六戶酌以銀百七錠鈔五千錠以河間路清池南皮縣牧地賜烏魯斯駐冬仍以呼哩所牧官羊給之河南河北道廉訪副使僧嘉努言自古求忠臣必于孝子之門今官于朝者十年不省覲者有之非無思親之心實由朝廷無給假省親之制而有擅離官次之禁古律諸職官父母在三百里于三年聽一給定省假二十日無父母

者五年聽一給拜墓假十日以此推之父母在三百里以至萬里宜計道里遠近定立假期其應省覲匿而不省覲者坐以罪若詐冒假期規避以掩其罪與詐奔喪者同科御史臺臣以聞命中書省禮部刑部及翰林集賢奎章閣議之丁巳雨木冰戊午西域諸王圖烈特穆爾遣使獻西馬及萄蒲酒預給四宿衛及諸潛邸衛士歲賜鈔人二百錠庚申遣集賢直學士達實密詣真定王華宮祀睿宗及顯懿莊聖皇后神御殿辛酉遣兵部

尚書伊蘇布哈同僉通政院事哈努勒布哈迎帝師詔
中書省御史臺遣官詣各道同廉訪司錄囚癸亥雨未
冰給征東元帥府兵仗丁卯御史臺臣言甘肅行省平
章伊嚕特穆爾既非蒙古族姓且闇事機不宜使總兵
柄詔樞密院勿令提調軍馬己巳御史臺臣言河東道
廉訪副使和濟格爾布哈僉燕南道廉訪司事布延呼
圖克王士元郝志善憲綱不振宜免官從之旌寧海崔
惟孝孝行是歲真定路屬州水冀寧河南二路旱大饑

元史卷三十五

元史卷三十五考證

正月己卯御製奎章閣記 按昭儉錄及趙汭東山集

皆云帝建奎章閣命虞集撰記御書刻石道園學古

錄載記文末書四月日記與此互異

璽河寨主改原刻作璽河據永樂大典及南監本改

常賦外歲增輸金五千兩銀七百兩 按天曆二年本紀

載每歲會入之數金五百二十七錠而此處景東一

府乃增輸至五千兩銀僅七百兩其多少懸殊不應

至是穀五千乃五十之訛也

欽定四庫全書

元史卷三十六

明翰林學士亞中大夫知制誥兼修國史宋濂等修

本紀第三十六

文宗五

三年春正月辛未朔高麗國王楨遣其臣元忠奉表稱
賀貢方物癸酉命高麗國王王燾仍爲高麗國王賜金
印初燾有疾命其子楨襲爵至是疾愈故復位甲戌賜

雅克特穆爾妻公主伊嚕勒金五百兩銀五千兩丁丑
禁冒哀求敘復者賑糶米五萬石濟京師貧民己卯時
享太廟罷諸建造工役惟城郭河渠橋道倉庫勿禁廣
西羅韋里叛寇馬武沖等合龍州嶺北朗龍洞韋大蟲
賊兵萬人攻陷那馬達那馬安等砦命廣西宣慰司嚴
軍禦之伊徹察喇冒請衛士芻束當坐罪雅克特穆爾
請釋之壬午命甘肅行省建邠王布延特穆爾居第封
孔子妻鄆國夫人亓官氏爲大成至聖文宣王夫人癸

未給納琳等十四驛糧及芻粟賑永昌路流民慶遠南
丹等處溪洞軍民安撫司言所屬宜山縣饑疫死者衆
乞以給軍積穀二百八十石賑糶從之江西行省言梅
州頻年水旱民大饑命發粟七百石以賑糶丙戌印造
歲額鈔本至元鈔九十九萬六千錠中統鈔四十錠丁
亥幸大承天護聖寺賜諸王特穆爾及其妃阿爾徹伯
爾金五百兩銀萬兩鈔二萬錠幣帛各千匹監察御史
劾奏翰林學士承旨達哈其兄阿哩雅坐誅當罷從之

戊子萬安軍黎賊王奴羅等集衆五萬人寇陵水縣已
丑賑肇慶路高要縣饑民九千五百四十口四川行省
言去年九月左丞特穆爾布哈與祿余賊兵戰被創賊
遂侵境乞調重慶敘州兵二千五百人往救之順元宣
撫司亦言賊列行營爲十六所乞調兵分道備禦詔上
都留守司建雅克特穆爾居第御史臺言選除雲南廉
訪司官多託故不行繼今有如是者風憲勿復用制可
戊戌命中書省以鈔三千錠幣帛各三千匹給皇子古

噶達喇歲例鷹犬回賜諸王章吉特獻俄羅斯百七十人酬以銀七十二錠鈔五千錠己亥給俄羅斯千人衣糧山南道廉訪副使圖沁多阿克劾荆湖北道宣慰使必里克圖嘗貸內府鈔威逼部民代償不足則以公帑鈔償之又副使羅矩以修治沿江堤岸縱家奴撻斂民財二人罪雖遇赦宜從黜退御史臺臣以聞從之庚子封公主布尼雅爲鄆安大長公主夔路忠信寨洞主阿具什用合洞蠻八百餘人寇施州二月辛丑朔八番苗

蠻駱度來貢方物癸卯諸王額森特穆爾薨甲辰諸王
達爾瑪實哩哈爾滿各遣使來貢蒲萄酒西馬金鴉鵂
乙巳以湖廣行省平章伊嚕布哈爲陝西行臺御史大
夫給邠王及其王傅祿戊申雲南行省言會通州土官
阿賽及河西阿勒等與羅羅斯兵千五百人寇會州路
之卜龍村又祿余將引兵與茫部合寇羅羅斯截大渡
河金沙江以攻東川會通等州臣等奉先所降詔書招
諭之不奉命則從宜進軍制可己酉賜集賽官諤勒哲

特穆爾及阿薩爾珠衣帽德寧路去年旱復值霜雹民
饑賑以粟三千石旌晉寧路沁州劉瑋妻張氏志節祿
余言于四川行省自父祖世為烏撒土官宣慰使佩虎
符素無異心曩為布呼誘脇比聞朝廷招諭而今期限
已過乞再降詔赦即率四路土官出降仍乞改屬四川
省隸永寧路冀得休息四川行省以聞詔中書樞密御
史諸大臣雜議之己未旌寧夏路趙那海孝行辛酉雅
克特穆爾兼奎章閣大學士領奎章閣學士院事己巳

命雅克特穆爾集翰林集賢太禧宗禋院議立太祖神
御殿詔修曲阜宣聖廟邛州有二井宋舊名曰金鳳茅
池天歷初九月地震鹽水湧湓州民侯坤願自煮鹽而
輸課於官詔四川轉運鹽司主之旌濟州任城縣王德
妻秦氏婺州路金華縣吳墳妻宋氏廬州路高仁妻張
氏甘州路烏呼納妻錫林蓋州完顏特爾格齊妻李氏
志節三月庚午朔帝師至京師遣使往西域賜諸王保
賽音繡綵幣帛二百四十匹中書省臣言凡遠戍軍官

死而歸葬者宜視民官例給道里之費又四川驛戶比
以軍興消乏宜遣官同行省賑之制可雅克特穆爾言
平江松江澱山湖圩田方五百頃有奇當入官糧七千
七百石其總佃者死頗為人占耕今臣願增糧為萬石
入官令人佃種以所得餘米贍臣弟薩都從之洛水瀍
瓜哇國遣其臣僧伽刺等八十三人奉金書表及方物
來朝貢已卯詔西寧王斯隆瑪鎮禦有勞其如安定王
多爾濟巴勒例置王傳官四人鑄印給之庚辰以安陸

府賜并王鴻和爾布哈爲食邑旌大都良鄉縣韋安妻
張氏貞節丁亥諸王巴約特勒哲特穆爾來朝戊子占
城國遣其臣阿南那那里沙等四人奉金書表及方物
來朝貢己丑復立功德使司癸巳皇子古魯達喇更名
雅克特古斯置興瑞司掌中宮歲作佛事秩正三品乙
未命雅克特穆爾復以鈔萬錠分給蒙古孤寡帝師泛
舟于西山高梁河調衛士三百挽舟丙申賜集賽官都
稜特穆爾璽書申飭其所部賑摩琳苦鹽濼扎哈碩隆

九驛之貧者凡四百五十二戶丁酉緬國遣使者阿落等十人奉方物來朝貢己亥賜行樞密院鈔四萬錠分給征烏撒烏蒙所調陝西四川蒙古軍及漸丁萬人高唐德冀諸州大名汴梁廣平諸路有蟲食桑葉盡夏四月壬寅中書省臣言去歲宿衛士給鈔者萬五千人今減去千四百人餘當給者萬三千六百人又太府監歲支幣帛二萬匹不足於用請再給二百匹並從之四川師壁散毛盤速出三洞蠻野王等二十三人來貢方物

戊申大寧路地震四川大盤洞謀者什用等十四人來貢方物丙辰諸王布斯必均凌遣使者烏呼納等及西域諸王保賽音使者額森特穆爾等皆來貢方物戊午命奎章閣學士院以國字譯貞觀政要鐫板模印以賜百官四川行省平章汪壽昌辭職不允以作佛事祈福釋御史臺所囚定興劉縣尹及刑部囚二十六人乙丑安南國世子陳日焯遣其臣鄧世延等二十四人來貢方物安西王阿南達之子伊嚕特穆爾與輝和爾僧烏

尼德巴廸爾班第國師喇特納實哩沙津阿固齊謀不軌命宗王大臣雜鞠之獄成三人皆伏誅仍籍其家以布喇特納實哩沙津阿固齊妻徹辰賜通政副使布琳玉鞍賜薩都餘人畜土田及七寶奩具金珠寶玉鈔幣並沒入大承天護聖寺免四川行省境內今年租命有司為已延建生祠立紀功碑于涿州仍別建祠立碑于汴梁戊辰免雲南行省田租三年安州饑給河間鹽課鈔萬錠賑之東昌濟寧二路及曹濮諸州皆有蟲食桑

五月己巳朔高昌王藏吉薨其弟太平努襲位壬申賑
摩琳七里等二十三驛人米二石癸酉熒惑犯東井賜
雅克特穆爾宴于流盃池雲南大理中慶等路大饑賑
鈔十萬錠甲戌陞尚舍寺爲從三品薩題請備錄皇上
登極以來固讓大凡往復奏答其餘訓敕辭命及雅克
特穆爾等宣力效忠之蹟命多喇續爲蒙古托卜齊延
一書置奎章閣從之賜湖廣行省平章托音納爾金虎
符旌保定路郭璫孝行塔坦妻凌布賢孝戊寅幸大承

天護聖寺京師地震有聲己卯命諸王伊實巴勒還鎮
浙西廉訪司劾副使三寶凶惡陰險紊亂紀綱詔罷之
壬午復賑糶米五萬石濟京城貧民戊子騰吉斯以疾
先往上都賜藥價鈔千錠遣使往帝師所居薩斯嘉之
地以珠織制書宣諭其屬仍給鈔四千錠幣帛各五千
匹分賜之賑特哩袞布拉克額布齊袞等十九驛人米
二石庚寅大駕發大都巡狩上都置山東益都等處金
銀銅鐵提舉司辛卯復以司徒印給萬安寺僧嚴吉祥

詔給鈔五萬錠修帝師帕克斯巴影殿壬辰太常博士
王瓚言各處請加封神廟濫及淫祠按禮經以勞定國
以死勤事能禦大災能捍大患則祀之其非祀典之神
今後不許加封制可丁酉白虹並日出長竟天追封顏
子父顏無繇為杞國公謚文裕母齊姜氏杞國夫人謚
端獻妻宋戴氏兗國夫人謚貞素甘州大電揚州之江
都泰興德安府之雲夢應城縣水汴梁之睢州陳州開
封之蘭陽封丘諸縣河水湓漳沱河決沒河間清州等

處屯田四十三頃常寧州饑賑糶米二千四百石杭州
火被災九十一戶池州火被災七十三戶命江浙行省
量賑之六月己亥朔以伊嚕特穆爾等罪詔告中外赦
天下免四川行省今年差稅陝西行省今年商稅錄用
托多王士熙托歡等己酉以御史中丞趙世安為中書
左丞癸丑遣使分祀嶽鎮海瀆戊午給鈔五萬錠賜雲
南行省為公儲己未雅克特穆爾言已延封浚寧王賜
食邑嵩州今請於瀕汴擇一州賜之詔改賜陳州癸亥

加授知樞密院事額布勒開府儀同三司乙丑御史臺
臣劾遼陽行省參政賽富昂庸鄙不勝任罷之監察御
史陳思謙言內外官非文武全才出處繫天下安危能
拯金革之難者勿許奪情起復制可禁諸卜筮陰陽人
毋出入諸王公大臣家晉寧冀州桑災益都濟寧大雨
無為州和州水旌歸德府永城縣民張氏孝節秋七月
戊辰朔諸王達爾瑪實哩等遣使來貢虎豹雲南行省
言本省舊降給驛璽書六十九金字圓符四布呼之亂

散失殆盡乞更賜為宜敕更賜璽書三十二圓符四仍
究詰所失者辛未以車坊官園賜已延賜從征雲南將
校三百四十七人鈔幣有差調軍士修柳林海子橋道
乙亥命僧於鐵幡竿修佛事施金百兩銀千兩幣帛各
五伯匹布二千匹鈔萬錠丁丑賑蒙古軍流離至陝西
者四百六十七戶糧三月遣復其居戶給鈔五十錠湖
廣行省言黎賊勢猖獗乞益兵三千以備調用有旨依
前詔促伊喇薩納剋日進兵壬午江西行省造螺鈔凡

榻遺雅克特穆爾詔賜匠者幣帛甲申雅克特穆爾獻
俄羅斯二千五百人旌裕州民李庭瑞孝行庚寅給鈔
萬錠命雅克特穆爾分賜累朝宮分嬪御之貧者壬辰
西域諸王保賽音遣哈智怯瑪昂以七寶水晶等物來
貢給蒙古民及各部衛士鈔幣有差仍賑糧五月甲午
北邊諸王伊濟貝遣納古爾等來朝貢雅克特穆爾言
諸王齊齊克圖沙格曩流南荒乞賜矜閔俾還本部從
之賑宗仁衛軍士九百戶各鈔一錠滕州民饑賑糶米

二萬石慶都縣大饑以河間鹽課鈔萬錠賑之八月辛丑諸王阿哩雅實哩獻俄羅斯三十人漸丁百三人賑大都寶坻縣饑民以京畿運司糧萬石癸卯吳王瑪納濟諸王特屯哈哈索諾木袞布特穆爾齊特們德爾等來朝賜護守上都宮殿衛卒二千二百二十九人人鈔二十五錠乙巳天鼓鳴于東北丙午遣官祭社稷丁未有事于太廟海道漕運糧六十九萬餘石至京師己酉隴西地震帝崩壽二十有九在位五年癸丑靈駕發引

葬起輦谷從諸帝陵元統二年正月己酉太師右丞相
巴延率文武百官等議上尊諡曰聖明元孝皇帝廟號
文宗國信謚號曰濟雅圖皇帝請諡于南郊三月己酉
附于太廟後至元六年六月以帝謀為不軌使明宗飲
恨而崩諡除其廟主放雅克特古斯於高麗未至伊徹
察喇害之於中道

元史卷三十六

元史卷三十六考證

監察御史陳思謙言 按思謙疏內尚有請革銓選之

弊三策見宋元通鑑本紀未載

命僧于鉄幡干修佛事 按鉄幡竿係渠名在上都西

山即今多倫諾爾界元周伯琦近光集有鉄剌標山

影之句原注云上京西山樹鉄竿高數十丈以其

下海中有龍故用梵家說鎮之久楊允孚滌京雜咏

詩云鉄幡竿下草如茵注云即鄂爾多據此則渠上

舊固有寺且有行宮駐蹕之所而今不可考也

放雅克特古斯于高麗 按原刻除其廟主下有于燕

遐之後祖母太皇太后等語文義不順考宋元通鑑

順帝至元六年六月下詔撤文宗廟主其畧曰昔我

皇祖武宗皇帝云云順帝本紀亦備載之此處蓋即

叙其事并錄其詔詞而顛倒錯亂至不可讀且文宗

名圖卜和穆爾原文作固帖睦迺詔內又改作脫脫

木兒皆當時載筆之誤考永樂大典所錄則此下即

云放雅克特古斯于高麗未至伊徹察刺害之于中
道以詔詞詳載順帝紀中故從刪節也深合紀載之
體今從之

欽定四庫全書

史部

元史卷

三十七
至四十

御史_臣徐如澍覆勘

總校官編修_臣朱鈐

欽定四庫全書

元史卷三十七

明翰林學士亞中大夫知制誥兼修國史宋濂等修

本紀第三十七

寧宗

寧宗冲聖嗣孝皇帝諱伊璘哲伯明宗第二子也母曰
皇后竊瑪錦氏初武宗有子二人長明宗次文宗延祐
中明宗封周王出居朔漠泰定之際正統遂偏天曆元

年文宗入紹大統內難既平即遣使奉皇帝璽綬北迎明宗明宗崩文宗復即皇帝位明宗有子二人長托歡特穆爾次即帝也天歷二年二月乙巳封帝為廊王至順三年八月己酉文宗崩于上都皇后導揚末命申固讓初志傳位於明宗之子時托歡特穆爾出居靜江帝以文宗眷愛之篤留京師太師太平王右丞相雅克特穆爾請立帝以繼大統乃遣使徵諸王會京師朝廷政務咸啓中宮取進止甲寅中書省臣奉中宮旨預備大

朝會賞賜金銀幣帛等物乙卯雅克特穆爾奉中宮旨
賜駙馬額布根子呼塔噶齊太尉布呼齊句容郡王達
朗達賚僉事蘇爾蘇克穆爾台之子圖卜特穆爾公主
布達拉安遠王綽哈妃公主托歡巴圖永寧王瑪展妃
公主諤勒哲台及公主徹爾特穆爾等金銀幣鈔有差
是月渾源雲內二州隕霜殺禾冀寧路之陽曲河曲二
縣及荊門州皆旱江水又溢高郵府之寶應興化二縣
德安府之雲夢應城二縣大雨水九月丁丑填星犯太

徵垣左執法卒已修皇太后儀仗是夜地震有聲來自北是月益都路之莒沂二州泰安州之奉符縣濟寧路之魚臺豐縣曹州之楚丘縣平江常州鎮江三路松江府江陰州中興路之江陵縣皆大水河南府之洛陽縣旱十月庚子帝即位于大明殿大赦天下詔曰洪惟太祖皇帝啓闢疆宇世祖皇帝統一萬方列聖相承法度明著庫魯克皇帝入纂大統修舉庶政動合成法授大寶位于布延圖皇帝以及格根皇帝歷數之歸當在胡

土克圖皇帝濟雅圖皇帝而各播越遼遠時則惟雅克特穆爾建義效忠戡平內難以定邦國協恭推戴濟雅圖皇帝登極之始即以讓兄之詔明告天下隨奉璽綬遠迓胡土克圖皇帝朔方言還奄棄臣庶濟雅圖皇帝薦正宸極仁義之至視民如傷恩澤旁被無間遠邇顧育眇躬尤篤慈愛賓天之日皇后傳顧命於太師太平王右丞相達爾罕雅克特穆爾太保淩寧王知樞密院事已延等謂聖體彌留益推固讓之初志以宗社之重

屬諸大兄胡土克圖皇帝之世嫡乃召諸王宗親以十月一日來會于大都與宗王大臣同奉遺詔揆諸成憲宜御神器以至順三年十月初四日即皇帝位于大明殿可大赦天下自至順三年十月初四日昧爽以前除謀反大逆謀殺祖父母父母妻妾殺夫奴婢殺主謀故殺人但犯強盜印造偽鈔蠱毒魘魅犯上者不赦外其餘一切罪犯咸赦除之大都上都興和三路差稅免三年腹裏差發并其餘諸郡不納差發去處稅糧十分為

率免二分江淮以南夏稅亦免二分土木工役除倉庫
必合修理外毋復剏造以紓民力民間在前應有逋欠
差稅課程盡行蠲免監察御史肅政廉訪司官并內外
三品以上正官歲舉才堪守令者一人申達省部先行
錄用如果稱職舉官優加旌擢一任之內或犯贓私者
量其輕重黜罰其不該原免重囚淹禁三年以上疑不
能決者申達省部詳讞釋放學校農桑孝義貞節科舉
取士國學貢試並依舊制廣海雲南梗化之民詔書到

日限六十日內出官與免本罪許以自新於戲肆予冲
人託于天下臣民之上任大守重若涉淵冰尚賴宗王
大臣百司庶府交修乃職思盡厥忠嘉與億兆之民共
保承平之治咨爾多方體予至意故茲詔示想宜知悉
詔以知樞密院事薩都為御史大夫中書右丞薩題為
中書平章政事宣政使奇爾濟蘇為中書左丞中書平
章政事圖勒噶特穆爾知樞密院事乙巳造皇太后玉
冊玉寶丁未皇太后命作兩宮幄殿車乘供張戊申賞

賚諸王金幣其數如文宗即位之制立徽政中政二院
己酉太白犯斗宿敕諸王駙馬勲舊大臣及中書省樞
密院御史臺秩正二品百司庶府秩至一品者闕門內
得施繩床以坐餘皆禁之庚戌修郊祀法服以官者特
古斯哈喇烏達里克哈噶濟庫庫楚並為中政院使辛
亥以江浙歲比不登其海運糧不及數俟來歲補運士
子定婦人犯私鹽罪著為令甲寅諸王保賽音遣使貢
塔哩雅八十八斤佩刀八十賜鈔三千三百錠乙卯以

即位告祭南郊丙辰給宿衛士蒙古漢軍三萬人禦寒
衣命江浙行省範銅造和寧宣聖廟祭器凡百三十有
五事己未告祭太廟庚申告祭社稷以巴延為徽政院
使依前開府儀同三司浚寧王太保錄軍國重事知樞
密院事提調忠翊侍衛親軍都指揮使司事巴咱爾右
都威衛都指揮使常布呼齊並為徽政院使賜諸妃后
大朝會賞賚有差甲子賜諸王呼喇台鈔五百錠皇弟
雅克特古斯受戒於西僧嘉勒幹巴勒百官及宿衛士

有濟遜衣者凡與宴饗皆服以待其質諸人者罪之內
寅楚丘縣河堤壞發民丁二千三百五十人修之十一
月己巳詔翰林國史集賢院奎章閣學士院集議先皇
帝廟號神主升祔武宗皇后及改元事庚午賜鄒王齊
齊克圖以海寧州朐山贛榆沐陽三縣壬申命鄒王齊
齊克圖鎮遼陽甲戌遣宿衛官阿恰齊以上皇太后玉
冊告祭南郊中書平章巴咱爾告祭太廟戊寅奉玉冊
玉寶尊皇后曰皇太后皇太后御興聖殿受朝賀己卯

三十一
帝御大明殿受朝賀庚寅賜諸王庫春幣帛各二千匹
以周其貧左欽察衛士饑賑糧二月壬辰帝崩年七歲
甲午葬起輦谷從諸陵明年六月己巳明宗長子托歡
特穆爾即位至元四年三月辛酉謚曰冲聖嗣孝廟號
寧宗四月乙酉祔于太廟

元史卷三十七

元史卷三十七考證

請立帝以繼大統 按順帝紀及雅克特穆爾傳雅克特穆爾欲立文宗子雅克特古斯后不從而止此云請立帝以繼大統殊為失實

甲寅 原刻上有八月二字係複出今刪

想宜知悉 原刻脫宜字不復成句今據永樂大典增至元四年三月辛酉謚曰冲聖嗣孝廟號寧宗 按順帝紀上謚祔廟在三年正月與此異

欽定四庫全書

元史卷三十八

明翰林學士亞中大夫知制誥兼修國史宋濂等修

本紀第三十八

順帝一

順帝名托歡特穆爾明宗之長子母哈爾努特氏名瑪里達郡王阿爾斯蘭裔孫也初太祖取西北諸國阿爾斯蘭率其衆來降乃封為郡王俾領其部族及明宗北

狩過其地納哈爾努特氏延祐七年四月丙寅生帝于
北方泰定帝崩太師雅克特穆爾與諸王大臣迎立文
宗文宗初即位以明宗嫡長復遣使迎立之明宗即位
于和寧之北而立文宗為皇太子及明宗崩文宗復正
大位至順元年四月辛丑明宗后班布爾實被讒遇害
遂徙帝高麗居大青島中不與人接閱一載復詔天下
言明宗在朔漠之時素謂非其已子移于廣西之靜江
三年八月己酉文宗崩雅克特穆爾請文宗后立太子

雅克特古斯后不從命立明宗次子伊埒指伯是為寧
宗十一月壬辰寧宗崩雅克特穆爾復請立雅克特古
斯文宗后曰吾子尚幼托歡特穆爾在廣西今年十三
矣且明宗長子禮當立之乃命中書右丞奇爾濟斯迎
帝于靜江至良鄉迓以鹵簿雅克特穆爾既見帝並馬
徐行具陳迎立意帝幼且畏之一無所答雅克特穆爾
疑之故帝至京久不得立適太史亦言帝不可立立則
天下亂以故議未決遷延數月國事皆決于雅克特穆

爾奏文宗后而行之會雅克特穆爾死后乃與大臣定議立帝且曰萬歲後其傳位于雅克特古斯若武宗仁宗故事諸王宗戚奉璽綬勸進四年六月己巳帝即位于上都詔曰洪惟我太祖皇帝受命于天肇造區夏世祖皇帝奄有四海治功大備列聖相傳丕承前烈我皇祖武宗皇帝入纂大統及致和之季皇考明宗皇帝遠居沙漠濟雅圖皇帝戡定內難讓以天下我皇考賓天濟雅圖皇帝復正宸極治化方隆奄棄臣庶今皇太后

召大臣雅克特穆爾巴延等曰昔者科緯托克托穆爾
濟爾噶朗等謀逆以明宗太子為名又先為班布爾實
始以妬忌妄構誣言疎離骨肉逆臣等既正其罪太子
遂遷于外濟雅圖皇帝後知其妄尋至大漸顧命有曰
朕之大位其以朕兄子繼之時以朕遠征南服以朕弟
伊埒哲伯登大位以安百姓乃遽至大故皇太后體承
濟雅圖皇帝遺意以武宗皇帝之元孫明宗皇帝之世
嫡以賢以長在予一人遣使迎還徵集宗室諸王來會

合辭推戴今奉皇太后勉進之篤宗親大臣懇請之至以至順四年六月初八日即皇帝位于上都於戲惟天惟祖宗全付予有家慄慄危懼若涉淵冰固知攸濟尚賴宗親臣隣交修不逮以底隆平其赦天下有阿勒呼木特穆爾者明宗親臣也言于帝曰天下事重宜委宰相決之庶可責其成功若躬自聽斷則必負惡名帝信之由是深居宮中每事無所專焉辛未命巴延為太師中書左丞相上柱國監修國史兼奎章閣大學士領學

士院太史院回回漢人司天監事薩敦為太傅左丞相
是月大霖雨京畿水平地丈餘饑民四十餘萬詔以鈔
四萬錠賑之涇河溢關中水災黃河大溢河南水災兩
淮旱民大饑秋七月霖雨潮州路水己亥太陰犯房宿
八月壬申鞏昌徽州山崩詔立雅克特穆爾女巴約特
氏為皇后九月甲午太陰犯填星己未太陰犯天江甲
寅中書省臣言官員遞陞窒礙選法今請自省院臺官
外其餘不許遞陞從之丁巳太陰犯填星己未太陰犯

氏宿庚申詔太師右丞相巴延太傅左丞相薩敦專理
國家大事其餘不得兼領三職秦州山崩賑恤寧夏饑
民五萬三千人一月詔免儒人役冬十月甲子太陰犯
斗宿丙寅鳳州山崩戊辰改元詔曰在昔世祖皇帝紹
開丕圖稽古建元立經陳紀列聖相承恪遵成憲肆予
冲人嗣大厯服茲圖治之云初嘉與民而更始乃新紀
號誕告多方其以至順四年為元統元年於戲一元運
于四時惟裁成之有道大統綿于萬世思保佑于無疆

中書省臣言凡朝賀遇雨請便服行禮從之己巳加知樞密院事達爾罕達哩金紫光祿大夫庚午詔以察汗諾爾宣慰司人民止令應當徽政院差事癸酉雲南催羅土官渾鄯馬弄來貢方物詔以其地陞立散府丁丑依皇太后行年之數釋放罪囚二十一人庚辰奉文宗皇帝及太皇太后御容于大承天護聖寺命左丞相薩敦為隆祥院使奉其祭祀己酉詔以高郵府為巴延食邑戊子封薩敦為榮王食邑廬州騰吉斯襲父封為太

平王進階金紫光祿大夫庚寅中書省臣請集議武宗
英宗明宗三朝皇后升祔十一月辛卯朔罷富州金課
甲午太陰犯壘壁陣丙申鞏昌成紀縣地裂山崩令有
司賑被災人民丁酉享于太廟辛丑起棕毛殿丙午申
飭鹽運司辛亥江西湖廣江浙河南復立權茶運司追
謚濟雅圖皇帝為聖明元孝皇帝廟號文宗時寢廟未
建于英宗室次權結綵殿奉安神主封巴延為秦王錫
金印是日秦州山崩地裂夜太陰犯太微東垣上相壬

子太陰犯填星癸丑太陰犯亢宿乙卯以雅克特穆爾
平江所賜田五百頃復賜其子騰吉斯罷河間大報恩
寺諸色人匠總管府江浙旱饑發義倉糧募富人出粟
以賑之詔秦王右丞相巴延榮王左丞相薩敦統百官
總庶政十二月庚申命巴延提調彰德威武衛乙丑廣
西徭寇湖南陷道州千戶郭震戰死寇焚掠而去壬申
遣省臺官分理天下囚罪狀明者處決冤者辨之疑者
讞之淹滯者罪其有司以納喇尼都代其父達喇齊為

耽羅國軍民安撫使司達嚕噶齊錫三珠虎符癸酉太
陰犯鬼宿甲戌圖沁特穆爾致仕錫太尉印置僚屬乙
亥為皇太后置徽政院設官屬三百六十有六員太白
犯壘壁陣太陰犯軒轅己卯太陰犯進賢癸未太陰犯
東咸

元統二年春正月庚寅朔雨血于汴梁著衣皆赤辛卯
東平須城縣濟寧濟州曹州濟陰縣水災民饑詔以鈔
六萬錠賑之以御史大夫圖卜台為中書平章政事阿

爾哈雅為河南行省左丞相丁酉享于太廟戊戌四川
大盤洞蠻謀谷什用遣男謀者什用來貢方物即其地
立盤順府命謀谷什用為知府遣吏部尚書鐵珠禮部
郎中智熙善使交趾以授時厯賜之太陰犯軒轅癸卯
勅僧道與民一體充役己酉以上文宗皇帝謚號遣官
告祭南郊庚戌太陰犯房宿甲寅罷廣教總管府立行
宣政院于杭州乙卯雲南土酋姚安路總管高明來貢
錫符印遣之二月己未朔詔內外興舉學校癸亥廣西

猺寇邊殺官吏廣海官已除而未上者罪之甲子塞北
東涼亭電民饑詔上都留守發倉廩賑之乙丑命有司
以時給宿衛冬衣以雅克布琳為太保置僚屬戊辰封
額爾勒額布根為昌寧王錫金印癸酉太陰犯太微上
相丁丑封皇姑托克托呼為英壽大長公主癸未安豐
路旱饑賑糶米萬六千七百石甲申太廟木陞壞遣官
告祭丁亥太白經天是月灤河漆河溢永平諸縣水災
賑鈔五千錠瑞州路水賑米一萬石三月己丑朔詔科

舉取士國子學積分錡學錢糧儒人免役悉依累朝舊制學校官選有德行學問之人以充辛卯以陰陽家言罷造作四年太陰犯填星癸巳廣西猺賊復起殺同知元帥奇爾薩掠庫物遣右丞圖魯默色將兵討之復立西番巡捕都元帥府罷廣誼司復立覆實司贈奇爾薩官令其子孫襲職庚子杭州鎮江嘉興常州松江江陰水旱疾疫勅有司發義倉糧賑饑民五十七萬二千戶癸卯月食既甲辰中書省臣言興和路起建佛事一路

所費為鈔萬三千五百三十餘錠請依上都大都例給
饒僧錢節其冗費從之己中書省臣言並都真定盜
起請選省院官往督捕之仍募能擒獲者倍其賞獲三
人者與一官從之丁未以河南行在左丞相阿爾哈雅
為江浙行省左丞相壬子廣西慶遠府徭賊寇全州詔
平章政事特默齊統兵二萬人擊之丁巳詔蒙古色目
犯奸盜詐偽之罪者隸宗正府漢人南人犯者屬有司
是月山東霖雨水湧民饑賑糶米二萬二千石淮西饑

賑糶米二萬石湖廣旱自是月不雨至于八月夏四月
戊午朔日有食之庚申封宗室曼濟為文濟王乙丑命
順元等處軍民宣撫使八番等處沿邊宣慰使巴延布
哈承襲父職丙寅罷龍慶州墨峪道上雙和爾站庚午
詔雲南出征亡歿軍士人賜鈔二錠以葬壬申命騰吉
斯為總管高麗女直漢軍萬戶府達魯噶齊與滿濟勒
噶台並為御史大夫丁丑太白經天戊寅太白晝見己
卯奉聖明元孝皇帝文宗神主祔于太廟躬行告祭之

禮樂用宮懸禮三獻先是御史臺臣言郊廟國之大典王者必行親祀之禮所以盡尊尊親親之誠宜因升祔有事于太廟帝從之是日罷夏季時享詔加榮王左丞相薩敦開府儀同三司上柱國錄軍國重事食邑廬州復立杭州四隅錄事司太白晝見壬午復如之帝嘉許衡輔世祖以不殺一天下特錄其孫從宗為章佩監異珍庫提點癸未立鹽局于京師南北城官自賣鹽以革專利之弊乙酉中書省臣言佛事布施費用太廣以世

祖時較之歲增金三十八錠銀二百三錠四十兩緡帛
六萬一千六百餘疋鈔二萬九千六百五十餘錠請除
累朝期年忌日之外餘皆罷從之是月車駕時巡上都
益都東平路水設酒禁大名路桑麥災成州旱饑詔出
庫鈔發常平倉米賑之河南災自是月不雨至于八月
五月己丑詔威武西寧王額格伯之子伊勒噶克齊襲
其父封宦者博囉特穆爾傳皇后旨取鹽一十萬引入
中政院辛卯以騰吉斯代薩敦為中書左丞相薩敦仍

商量中書省事壬辰命中書平章政事薩題領蒙古國
子監癸巳罷洪教提點所戊申詔文濟王曼濟鎮大名
雲南王阿魯鎮雲南給銀字圓牌是月中書省臣言江
浙大饑以戶計者五十九萬五百六十四請發米六萬
七百石鈔二千八百錠及募富人出粟發常平義倉賑
之并存海運糧七十八萬三百七十石以備不虞從之
詔王侯宗戚軍站人匠鷹坊控鶴但隸京師諸縣者令
所在一體役之贈故中書平章政事王泰亨謚清憲舊

令三品以上官立朝有大節及有大功勲于王室者得
賜功臣號及謚時寢冗濫失實惟泰亨在中書時安南
請佛書乞以九經賜之使高麗不受禮遺為尚書貧不
能自給故特賜是謚贈漳州萬戶府知事闕文興英毅
侯妻王氏貞烈夫人廟號雙節六月丁巳朔中書省臣
言雲南大理中慶諸路曩因圖沁布呼反叛民多失業
加以災傷民饑請發鈔十萬錠差官賑恤從之戊午淮
河漲淮安路山陽縣滿浦清岡等處民畜房舍多漂溺

丙寅宣德府水災出鈔二千錠賑之乙亥騰吉斯辭左丞相不拜復命薩敦為左丞相辛巳詔蒙古色目人行親喪癸未復立繕工司造繒帛乙酉贈雅克特穆爾公忠開濟宏謨同德翊運佐命功臣開府儀同三司太師中書右丞相追封德王謚忠武是月彰德雨白毛大寧廣寧遼陽開元瀋陽懿州水旱蝗大饑詔以鈔二萬錠遣官賑之秋七月丁亥戒陰陽人毋得于貴戚之家妄言禍福辛卯祭太祖太宗睿宗三朝御容罷秋季時享

壬辰帝幸大安閣是日宴侍臣于奎章閣甲午太白晝
見己亥太白經天壬寅詔蒙古色目人犯盜者免刺甲
辰太白經天丙午復如之帝幸楠木亭己酉太白晝見
夜有流星大如酒盃色赤長五尺餘光明燭地起自天
津沒于離宮之南庚戌太白經天天壬子復如之夜熒惑
犯鬼宿癸丑甲寅太白復經天是月池州青陽銅陵饑
發米一千石及募富民出粟賑之八月丙辰朔太白經
天凡四日戊午祭社稷癸亥太白經天丙寅至戊辰太

白復經天辛未赦天下京師地震雞鳴山崩陷為池方
百里人死者甚衆自是日至甲戌太白經天丁丑巳卯
復如之夜犯軒轅庚辰至壬午太白復經天癸未中書
平章政事阿爾哈雅罷是月南康路諸縣旱蝗民饑以
米十二萬三千石賑糶之九月庚寅太白經天辛卯車
駕還自上都壬辰太陰犯南斗癸巳太白犯靈臺甲午
太白經天徭賊犯賀州發河南江浙江西湖廣諸軍及
八番義從軍命廣西宣慰使都元帥章巴延將以擊之

己未太白經天己亥壬寅復如之己巳太白犯太微垣
壬子吉安路水災民饑發米二萬石賑之夜太白犯太
微垣冬十月己卯朔正內外官朝會儀班次一依品從
戊午享于太廟辛酉以侍御史許有壬為中書叅知政
事癸亥太白犯太微上相復犯進賢丁卯立湖廣黎兵
屯田萬戶府統千戶一十三所每所兵千人屯戶五百
皆士人為之官給田土牛種農器免其差役又勅立武
安縣移石山寨巡檢司于清水寨立霍邱縣淮陰鄉臨

水山巡檢司改乾寧軍民安撫司曰乾寧安撫司己亥
太陰犯軒轅太白犯填星己卯奉玉冊玉寶上皇太后
尊號曰贊天開聖仁壽徽懿昭宣皇太后詔曰朕登大
寶君臨萬方永惟太母擁佑之勤神靈尊安海內寧謐
實慈訓之致然也爰協衆議再舉徽稱而皇太后以文
宗皇帝未祔于廟至誠謙抑弗賜俞允今告祔禮成亦
既閱歲始徇所請乃以吉日奉上尊號思與普天同茲
大慶其赦天下免今年民租之半内外官四品以下減

一資却天鵝之獻癸未命臺憲部官各舉材堪守令者
一人十一月戊子中書省臣請發兩艘船下番為皇后
營利濟南萊蕪縣饑罷官治鐵一年辛卯賜行宣政院
廢寺鈔一千錠以營公廨乙未填星犯亢宿庚戌熒惑
犯太微垣是月鎮南王博囉布哈來朝十二月立道州
永明縣白面墟江華縣濤墟巡檢司各一以鎮遏獯賊
甲戌詔整治學校是歲禁私剏寺觀庵院僧道入錢五
十貫給度牒方出家

至元元年春正月癸巳申命廉訪司察郡縣勸農官勤惰達大司農司以憑黜陟乙未立徽政院屬官侍正府丙午雲南婦人一產三男二月甲寅朔革冗官乙卯車駕將田于柳林御史臺臣諫曰陛下春秋鼎盛宜思文皇付托之重致天下于隆平況今赤縣之民供給繁勞農務方興而馳騁冰雪之地倘有銜橛之變奈宗廟社稷何遂止丁巳立縹甸散府一穆由甸范陵甸軍民長官司二以薊州寶坻縣稻田提舉司所轄田土賜已延

戊午祭社稷甲戌熒惑逆行入太微己卯以上皇太后
冊寶遣官告祭天地三月癸未朔詔遣五府官決天下
囚御史臺臣言丞相已領軍國重事省院臺官俱不得
兼領各衛從之平伐都雲定雲酋長寶郎天都蟲等來
降即其地復立宣撫司叅用其土酋為官辛卯以上皇
太后寶冊遣官告祭太廟壬辰河州路大雪十日深八
尺牛羊駝馬凍死者十九民大饑丙申中書省臣言甘
肅甘州路十字寺奉安世祖皇帝母布濟克太后御容

請定祭禮從之丁酉以霑益州所轄羅山石梁交水三縣并歸巡檢司月食己亥龍興路饑出糧九萬九千八百石賑之庚子御史臺臣言高麗為國首效臣節而近年屢遣使往選取媵妾至使生女不舉女長不嫁乞賜禁止從之中書省臣言帝生母太后神主宜于太廟安奉命集議其禮甲辰山東河間兩淮福建四處增鹽課一十八萬五千從中書請權罷徵止令催辦正額已巳以中書左丞王結叅知政事許有壬知經筵事封安南

世子陳端午為安南國王是月並都路沂水日照蒙陰
莒縣旱饑賑米一萬石夏四月癸丑朔詔諸官非節制
軍馬者不得佩金虎符辛酉享于太廟以江南行御史
臺中丞布哈為中書省叅知政事壬戌太陰犯左執法
丙寅以鈔五十萬錠命徽政院散給達勒達俄羅斯集
賽台各愛滿已巳加騰吉斯開府儀同三司己卯詔翰林
國史院纂修累朝實錄及后妃功臣列傳庚辰罷功德
典瑞營繕集慶靖正羣玉繕工金玉珠翠諸提舉司

以薩題為御史大夫禁犯御名是月河南旱賑恤芍陂
屯軍糧兩月五月壬午朔皇太后以膺受寶冊恭謝太
廟丙戌占城國遣其臣刺忒納瓦兒撒來獻方物且言
交趾遏其貢道詔遣使宣諭交趾戊子車駕時巡上都
遣使者詣曲阜孔子廟致祭加巴咱爾金紫光祿大夫
壬辰命嚴謚法以絕冒濫京畿民饑詔有司議賑恤癸
卯太陰犯壘壁陣甲辰巳延請以右丞相讓騰吉斯詔
不允命騰吉斯為左丞相是月永新州饑賑之六月辛

酉有司言甘肅實喇威產金銀請遣官稅之壬戌太陰
犯心宿癸酉禁服色不得僭上乙亥罷江淮財賦總管
府所管杭州平江集慶三處提舉司以其事歸有司詔
湖南宣慰使司兼都元帥府總領所轄諸路鎮守軍馬
庚辰巴延奏騰吉斯及其弟塔喇海謀逆誅之幽皇后
巴約特氏大霖雨秋七月辛巳朔以滿濟勒噶台阿哈
齊並為御史大夫壬午巴延弒皇后巴約特氏于開平
民舍丁亥享于太廟壬辰加滿濟勒噶台銀青榮祿大

夫開府儀同三司領承徽寺乙未太陰犯壘壁陣壬寅
專命已延為中書右丞相罷左丞相不置癸卯立托克
托和斯于察汗諾爾之地乙巳罷雅克特穆爾騰吉斯
舉用之人戊申誅達哩及拉拉等詔曰曩者文宗皇帝
以雅克特穆爾嘗有勞伐父子兄弟顯列朝廷而輒造
事釁出朕遠方文皇尋悟其妄有旨傳次于予雅克特
穆爾貪利幼弱立朕弟伊埒哲伯不幸崩殂今丞相巴
延追奉遺詔迎朕于南既至大都雅克特穆爾猶懷兩

端遷延數月天隕厥躬巴延等同時翊戴乃正宸極後
薩敦達哩騰吉斯相襲用事交通宗王鴻和特穆爾圖
危社稷阿恰齊亦嘗與謀賴巴延等以次掩捕明正其
罪元凶構難貽我皇太后震驚朕用兢惕永惟皇太后
後其所生之子一以至公為心親挈大寶畀予兄弟迹
其定策兩朝功德隆盛近古罕比雖嘗奉上尊號揆之
朕心猶為未盡已命大臣特議加禮巴延為武宗捍禦
北邊翼戴文皇茲又克清大慙明飭國憲爰賜達爾罕

之號至于子孫世世永賴可赦天下是月西和州徽州
雨雹民饑發米賑之八月辛亥朔熒惑犯氐宿戊午祭
社稷癸亥以岐陽王鄂勒哲特穆爾知樞密院事特穆
爾布哈並為御史大夫甲子加鄂勒哲特穆爾太傅戊
寅道州永興水災發米五千石及義倉糧賑之己卯議
尊皇太后為太皇太后許有壬諫其非禮不從是月廣
西徭反命湖廣行省右丞鄂勒哲特之沅州等處民饑
賑米二萬七千七百石九月庚辰朔車駕駐振狐嶺丙

戊戌丁亥封知樞密院事奇爾濟蘇為宜國公太保中
書平章政事鼎珠為宣德王夜太陰犯斗宿庚寅太陰
犯壘壁陣庚子加中書平章政事徹爾特穆爾銀青榮
祿大夫命有司造太皇太后玉冊玉寶御史臺臣言國
朝初用宦官不過數人今內府執事不下千餘乞依舊
制裁減冗濫廣仁愛之心省糜費之患從之丙午詔以
烏撒烏蒙之地隸四川行省是月耒陽常寧道州民饑
以米萬六千石并常平倉賑糶之車駕還自上都以京

畿鹽換羊一萬口冬十月甲寅熒惑犯南斗丙辰以大
司農塔斯哈雅為太尉置僚屬商議中書省事丁巳以
達實特穆爾為太禧院使議軍國重事流鴻和特穆爾
達哩騰吉斯子孫于邊地詔海道都漕運萬戶府船戶
與民一體充役壬戌加御史大夫特穆爾布哈銀青榮
祿大夫癸亥流御史大夫鄂勒哲特穆爾于廣海安置鄂
勒哲特穆爾乃賊臣額森特穆爾骨肉之親御史以為
言故斥之選省院臺宗正府通練刑獄之官分行各道

與廉訪司審決天下囚甲子太陰犯昴宿丁卯太陰犯斗宿戊辰太白晝見以宗王伊蘇格爾弟薩奇襲其兄封監察御史呂思誠等十九人劾奏徹爾特穆爾之罪不聽皆辭去惟陳允文以不署名留辛未太皇太后王冊王寶成遣官告祭于太廟是月以巴延獨任中書右丞相詔天下十一月庚辰勅以所在儒學貢士莊田租給宿衛衣糧詔罷科舉甲申太白經天乙酉巴延請內外官悉循資銓注今後毋得保舉滯選法從之丙戌太

白經天己丑辰星犯房宿癸巳命知樞密院事滿濟勒
噶台領武備寺甲午以雅克特穆爾騰吉斯達哩所奪
高麗田宅還其王喇特納實哩丁酉以戶部尚書徐夔
吏部尚書鼎珠叅議中書省事戊戌召前知樞密院事
布敦實喇布哈實喇德格還京初二人以帝未立謀誅
雅克特穆爾為所誣貶故正之己亥太陰犯太微垣庚
子太陰犯左執法辛丑下詔改元詔曰朕祇紹天命入
纂丕緒于今年夙夜寅畏罔敢怠荒茲者年穀順成

海宇清謐朕方增修厥德日以敬天恤民為務屬太史
上言星文示儆將朕德菲薄有所未逮歟天心仁愛俾
予以治有所告戒歟弭災有道善政為先更號紀年實
唯舊典惟世祖皇帝在位長久天人協和諸福咸至祖
述之志良切朕懷今特改元統三年仍為至元元年適
遵成憲誕布寬條庶格禎祥永綏景祚赦天下立常平
倉丁未賜知樞密院事徹爾特穆爾三珠虎符十二月
己酉朔荆門州獻紫芝以廩給司屬通政院加知樞密

院事奇爾濟斯銀青榮祿大夫兼左翊蒙古侍衛親軍
都指揮使壬子太陰犯壘壁陣乙卯命雲南行省造軍
士錢糧新舊之籍丙辰制省諸王公主駙馬飲膳之費
詔徵高麗國王喇特納實哩入朝丁巳詔巴延領宮相
府戊午日赤如赭辛酉太白犯壘壁陣壬戌撥廬州饒
州牧地一百頃賜宣讓王特穆爾布哈命四川雲南江
西行省保選蠻夷官以俟銓注乙丑奉玉冊玉寶上太
皇太后尊號曰贊天開聖徽懿昭宣貞文慈祐儲善衍

慶福元太皇太后詔曰欽惟太皇太后承九廟之托啟
兩朝之業親以大寶付之眇躬尚依擁佑之慈恪尊仁
讓之訓爰極尊崇之典以昭報本之忱庸上徽稱宣告
中外命宣政院使摩濟以司徒就第太白犯軒轅夫人
星丙寅太白經天丁卯復如之夜太陰犯右執法庚午
太白經天壬申復如之癸酉歲星晝見己亥太白歲星
皆晝見丙子安慶蘄黃地震丁丑西番賊起遣兵擊之
戊寅蒙古國子監成是日太白經天歲星晝見是月寶

慶路饑賑糶米三千石閏月乙酉詔四川鹽運司于鹽井仍舊造鹽餘井聽民煮造收其課十之三熒惑犯壘壁陣丁亥日赤如赭凡三日戊子復以宗正府為大宗正府壬辰詔宗室托克托穆爾襲封荆王賜金印命掌莽賚諸軍設立王府官屬丁酉御史大夫薩題加銀青榮祿大夫領奎章閣知經筵事戊戌御史臺臣復劾奏中書平章政事徹爾特穆爾罪罷之庚子太陰犯心宿壬寅流徹爾特穆爾于南安太陰犯箕宿癸卯太陰犯

南斗丙午詔平章政事塔斯哈雅領都水度支二監是
歲江西大水民饑賑糶米七萬七千石賜天下田租之
半凡有妻室之僧令還俗為民既而復聽為僧移牒為
縣還舊治

元史卷三十八

元史卷三十八考證

薩敦為太傅左丞相 原刻作右丞相考元史類編是
時復設左丞相以薩敦為之且巴延已為右相則薩
敦為左相無疑永樂大典亦同今據改

奉文宗皇帝及太皇太后御容于大承天護聖寺

按此云太皇太后未詳何人武宗三后御容已奉安
于大崇恩福元寺及普慶寺且生前並未膺尊號至
太宗后稱太皇太后在至元元年且太后現存不應

先與文宗同祭史無明文今識以闕疑

立行宣政院于杭州 原刻不載其地于事實未明據

百官志增

中書平章政事阿里哈雅罷 按阿里哈雅已于正月
除河南行省丞相宰相表亦同三月復自河南改江
浙行省左丞相是阿里哈雅之去中書久矣此處又
書其罷平章政事殊為舛駁

丁酉月食 按月食史例不書獨此卷至四十一卷載

之與前後本紀體例皆不符今仍原文而于初見處
附識其誤

貽我皇太后震驚 原刻作太皇后按是時尚未加尊
號應止稱皇太后今據元史類編改

丙戌太白經天已丑辰星犯房宿 原刻附在癸巳一
條之下今按甲子改正

上太皇太后尊號曰贊天開聖徽懿昭宣 原刻訛宣
詔考永樂大典作宣昭今據元統二年本紀文改

